

La populaziun fa adina dapli adiever da l'internet

Dals resultats d'ina nova retschertga da l'Uffizi federal da statistica (3)

DA MARTIN CABALZAR

■ **L'emprim quartal 2017 navigavan 90 pertschient da las personas creschidas en Svizra en l'internet. Tar l'ultima retschertga che datescha da l'onn 2014 eran quai anc stads 84 pertschient.**

Creschì marcantamain è l'adiever da l'internet cunzunt tar las personas sur 65 onns. En il medem mument è era la durada ch'ils utilisaders passentan en l'internet creschida marcantamain. Quai resorta dad ina retschertga fatga dacurt da l'Uffizi federal da statistica.

2017 diponivan flavel nov da diesch chasadas svizas d'in access a l'internet al lieu. La cumpart da la chasadas colliadas cun l'internet è prest tuttina auta en tut las regiuns da la Svizra. La suletta excepziun furma il chantun Tessin, là disponan sulettamain otg da diesch chasadas d'ina colliaziun a l'internet.

Adina dapli medias d'access ed adiever creschent

Dapi la derasaziun rapida da smartphones e tablets è tant l'adiever mobil da l'internet sco era l'adiever da las colliaziuns sta-

blas da l'internet en las chasadas creschids. La cumpart da las chasadas cun access mobil a l'internet è creschida da 60 pertschient l'onn 2014 sin 78 pertschient l'onn 2017. Sulet otg pertschient da las chasadas colliadas 2017 cun l'internet disponivan en il lieu dad in sulet access, 2014 eran quai anc 13 pertschient. Tras quai èn s'augmentadas tant las frequenzas sco era las duradas da l'adiever da l'internet. 2017 han 85 pertschient dals interrogads inditgà d'avair fatg adiever da l'internet il di avant, l'onn 2014 eran quai anc stads 75 pertschient. Er il dumber da las diversas activitads online ed il temp passentà en l'internet è creschids.

Affinitad da senioras e seniors

Bunamain l'entira populaziun svizra tranter 15 e 54 onns dispona oz d'in access a l'internet. Tut tenor categoria da vegliadetgna munta la cumpart a 96 fin 99 pertschient. Questa cumpart n'è strusch pli sa midada dapi 2014, anzi, ins po constatar ch'ils basegns èn apparentamain pli u main saziads. Tar personas en la vegliadetgna da 55 fin 64 onns constateschan ins dentant in augment

marcant. Oz nizzegian 91 pertschient da questa gruppa l'internet en cumparegliaziun cun 80 pertschient avant trais onns. Anc pli marcant è il creschament d'access a l'internet tar las personas da 65 fin 74 onns. Da quels navigheschan oz 77 pertschient en l'internet, 2014 eran quai anc 62 pertschient. La finala nizzegia era strusch la mesadad (45%) da las personas sur 75 onns l'internet, quai che correspunda ad in agument da 20 pertschient en il decurs dals ultims trais onns.

Dapli consum sur l'internet

L'adiever da l'internet en il mintgadi ha er influenzà e spustà la tenuta da cumpra dals consumers. 2017 han dus terzs da la populaziun svizra inditgà d'avair fatg almain ina cumpra en l'internet en il decurs dals ultims trais mais. L'onn 2014 eran quai anc stads 56 pertschient.

Participaziun a la «Sharing Economy»

En la «Sharing Economy» vegn ina raura partida u consumada da cuminanza. Ina persona privata che posseda ina raura fittescha quella sur l'internet ad in'au-

tra persona. Passa ina quarta da la populaziun svizra fa adiever da questa spezia da consum.

Per il transport da personas han otg pertschient da la populaziun ina app specialisada ed 11 ina app nunspecialisada, auters consulteschan ina pagina d'internet, sco per exempel en la rait sociala. Sin il sector da pernottaziuns e da transport vegn la «Sharing Economy» utilisada cunzunt da personas giuvnas. La pli gronda part dals utilisaders è tranter 15 e 44 onns.

La cumpart da las personas che chargin giu films e musica sur plattafurmas specialisadas è creschida tranter 2014 e 2017 da 42 sin 48 pertschient per musica e da 50 sin 58 pertschient per films e videos. En il medem mument stagnescha il stgomi da musica e film tranter personas privatas sur reits da «Peer-to-Peer» (P2P) sin ina cumpart da 16 pertschient.

Problem da segirtad vegn savens ignorà

Flavel ina terza da las utilisadras e dals utilisaders da l'internet ha inditgà da betg far adiever da software da segirtad u na sa-

betg sch'els possedan insumma tals programs u betg. Questa cumpart è creschida constantamain dapi 2010, quai che po parair alarmant. Paradoxamain èn dentant ils problems da segirezza che vegnan effectuads da virus sa reducids ils ultims trais onns.

Quest svilup è d'attribuir a trais facturs. Dad ina vart vegnan ils pensums da segirezza da las utilisadras e dals utilisaders delegads dapi 2010 adina dapli ad auters. Per 2017 han 12 pertschient dals interrogads inditgà che personas che vivan en il medem tegnairchasa s'occupian da quest problem. Da l'autra vart giogan l'installaziun e l'administraziun automatica da la «software da segirezza» sin ils computers ina rolla, malgrà che l'existenza e la funcziun da quest servetsch èn savens gnanc enconuscentas als utilisaders.

En vista als ristgs creschents da l'internet en il decurs dals ultims onns ston ins dentant tuttina constatar che la cumpetenzza d'informatica da las utilisadras e dals utilisaders d'internet sa sviluppescha pli plaun che l'adiever general da l'internet.